

1. CYRTOCHILUM UNDULATUM. † Tab. LXXXIV.

C. foliolis calycinis ovatis, undulatis, patentibus.

*Crescit locis rupestribus, aere temperato utentibus, prope pagum La Ascension et Paramo de las Papas, alt. 1045 hex. (Andib. Novogranat.) ♀ Floret Novembri.*

PLANTA parasitica. BULBUS oblongus. FOLIA lanceolato-oblonga, acuta, basi angustata, plana, subcoriacea, striata, undecim-aut tredecimnervia, nervis subtus prominentibus, subpedalia, duos pollices lata. SCAPUS orgyalis, teres, glaber, apice ramosissimus, paniculatus; ramulis flexuosis. SPATHELLÆ marcidæ, subrotundo-ovatæ, acutiusculæ, concavæ, striatæ, glabræ. FLORES pedicellati. CALYX patens, glaber; foliola quinque ovata, acutiuscula, unguiculata, plana, margine undulata, fuscescentia; duo interiora exterioribus minora, albo- et flavo-maculata; labellum (*fig. 1.*) ovato-lanceolatum, convexum, pendulum, basi tuberculis numerosis cristatum, foliolis exterioribus triplo brevius, exterius roseum, interius flavum, maculis rubris et albis variegatum. OVARIUM costatum, glabrum. GYNOSTEMUM adscendens, breve, apice utrinque alatum. ANTHERA (*operculum antheræ fig. 3.*) terminalis, bilocularis. POLLINIS massæ (*fig. 2.*) duæ, oblongæ, pedicello communi, filiformi, basi incrassato insidentes.

Epidendro punctato Linn. affine.